

MINISTERIO DE ECONOMÍA E FACENDA

6787 *RESOLUCIÓN do 29 de marzo de 2006, da Dirección Xeral de Coordinación Financeira coas Entidades Locais, pola que se desenvolve a información que deben subministrar as corporacións locais relativa ao esforzo fiscal e a súa comprobación nas delegacións de Economía e Facenda.* («BOE» 90, do 15-4-2006.)

A Lei 30/2005, do 29 de decembro, de orzamentos xerais do Estado para 2006, establece a fórmula para o cálculo do esforzo fiscal dos municipios, necesario para proceder á liquidación definitiva da participación dos municipios nos tributos do Estado correspondente a 2006. Esta fórmula desenvólvese en termos análogos aos exercicios anteriores.

Así mesmo, en virtude da citada lei, o 30 de xuño de 2006 considérase data límite de presentación da información sobre esforzo fiscal ante as delegacións provinciais de Economía e Facenda.

Co obxecto de facilitar aos concellos o cumprimento desta obriga esta dirección xeral ditou a presente resolución, conforme a habilitación establecida no artigo 100.a) da Lei 30/2005 antes mencionada.

Punto 1. Información que deben subministrar as corporacións locais.—Para calcular o esforzo fiscal municipal coa maior precisión, requírese a información que, con carácter básico e complementario, se cita nos puntos seguintes.

1.1 Información básica: os concellos deberán achegar certificación dos seguintes datos referidos ao exercicio 2004:

a) Recadacións líquidas dos seguintes tributos:

Imposto sobre bens inmobles, tanto de natureza urbana, incluíndose se é o caso a recadación por bens inmobles de características especiais, como de natureza rústica.

Imposto sobre actividades económicas.

Imposto sobre vehículos de tracción mecánica.

b) Base imponible do imposto sobre bens inmobles de natureza urbana. Sempre que se cite a base imponible do imposto sobre bens inmobles entenderase nos termos da disposición adicional novena do texto refundido da Lei reguladora das facendas locais, aprobado mediante o Real decreto lexislativo 2/2004, do 5 de marzo, que establece que as bases impositivas do mencionado imposto que hai que considerar no cálculo do esforzo fiscal, para os efectos da distribución da participación en tributos do Estado a prol dos concellos, «... corresponderanse co importe dos valores catastrais minorados na contía da redución establecida nesta lei que, se é o caso, corresponda aos inmobles do municipio en cada exercicio económico». (Artigos 65 a 70 do citado texto refundido.)

c) Tipos impositivos aplicados do imposto sobre bens inmobles, tanto de natureza urbana coma rústica.

d) Cota tributaria total exixible no municipio polo imposto sobre actividades económicas.

Estes datos proporcionaranos os concellos utilizando o modelo de certificado recollido no anexo desta resolución, que será solicitado por aqueles ou facilitado polas unidades de coordinación coas facendas locais e autónoma das delegacións especiais e provinciais de Economía e Facenda da Administración do Estado.

1.2 Información complementaria: no caso de a xestión recadatoria estar encomendada a outro ente territorial a cuxa demarcación pertencen os concellos, co cal se formalizase o correspondente convenio ou no cal se delegase esta facultade, deberase remitir ademais certificado da recadación obtida por aquel ente, o cal deberá emitilo en cumprimento da obriga dimanante das relacións interadministrativas a que fai referencia o artigo 55 da Lei 7/1985, do 2 de abril, reguladora das bases de réxime local.

No documento que expida o órgano competente, deberá quedar constancia de que os ingresos corresponden ao exercicio de 2004 e que foron recadados dentro do período voluntario. Igualmente, haberá de especificarse que a recadación líquida polo imposto sobre actividades económicas contida nas certificacións expedidas, corresponde exclusivamente a ingresos municipais, excluídas se é o caso as recargas a favor de entes provinciais e as cotas nacionais e provinciais.

Punto 2. Remisión da información ás delegacións de Economía e Facenda.—Os concellos, reunida a información citada no punto 1, remitirana á Delegación de Economía e Facenda da súa provincia antes do día 1 de xullo de 2006, segundo establece o artigo 100.a) da Lei 30/2005, do 29 de decembro, de orzamentos xerais do Estado para 2006.

A aqueles municipios que non acheguen a documentación anterior nas condicións sinaladas seralles de aplicación, para os efectos de practicar a liquidación definitiva da súa participación nos tributos do Estado correspondente a 2006, o coeficiente mínimo do esforzo fiscal medio calculado nos termos do último parágrafo do artigo 100.a) citado.

Punto 3. Comprobación da información subministrada polas corporacións locais.

3.1 Os responsables das unidades de coordinación das delegacións de Economía e Facenda proporcionarán aos concellos o modelo de certificado incluído no anexo desta resolución. Unha vez recibido este, debidamente cuberto e documentado, comprobarán o seu contido conforme os puntos seguintes.

3.2 Comprobación das recadacións: para a comprobación das recadacións obtidas polos diferentes tributos deberanse ter en conta os seguintes extremos:

a) Os concellos deberán achegar datos da recadación líquida obtida en período voluntario correspondente ao exercicio de 2004.

b) No caso de que existan discrepancias respecto aos mesmos tributos entre os datos do certificado expedido polo órgano recadador provincial ou supramunicipal e as cifras achegadas polo Concello, prevalecerán as recollidas naquel, salvo cando haxa actuacións de recadación municipal (por exemplo: altas en padróns tributarios), caso en que se recollerán por separado e se sumarán ambos os dous importes.

c) A recadación do imposto sobre actividades económicas non poderá exceder a cota tributaria total, deducida da tarifa (cota modificada pola aplicación do coeficiente de ponderación, incrementada, se é o caso, polo coeficiente de situación, excluíndo as recargas provinciais e as cotas provinciais e nacionais). Esta recadación incrementase co importe da compensación que en relación a 2004 se recoñece aos concellos por bonificacións na cota deste imposto concedidas a cooperativas fiscalmente protexidas.

d) A recadación do imposto sobre bens inmobles de natureza urbana non poderá exceder en ningún caso a aplicación do tipo impositivo acordado polo concello sobre a base imponible suxeita a tributación, datos que se inclúen no modelo de impreso de recolla de datos do esforzo fiscal. Esta recadación incrementase co importe da compensación que en relación a 2004 se lles recoñece.

cese aos concellos por bonificacións na cota deste imposto concedidas a centros educativos concertados.

3.3 Comprobación de elementos tributarios básicos: a comprobación dos elementos tributarios básicos deberá incidir nos seguintes aspectos:

a) A base imponible do imposto sobre bens inmoables de natureza urbana nos termos da disposición adicional novena e nos artigos 65 a 70 do texto refundido da Lei reguladora das facendas locais, aprobado polo Real decreto lexislativo 2/2004, do 5 de marzo. Para estes efectos excluírase a base imponible que corresponda a bens exentos de tributación neste imposto.

b) Os tipos impositivos do imposto sobre bens inmoables, tanto de natureza urbana como rústica, deberán estar incluídos nos límites que se fixan no artigo 72 do citado texto refundido da Lei reguladora das facendas locais.

c) A cota tributaria total do imposto sobre actividades económicas non deberá incluír cotas provinciais ou nacionais nin recargas provinciais.

3.4 Resultados da comprobación: realizada a comprobación conforme os criterios anteriores, e axustándose a estes as certificacións correspondentes, os datos nelas incluídos deberán gravalos as unidades de coordinación accedendo ao enderezo da internet que para estes efectos habilite a Dirección Xeral de Coordinación Financeira coas entidades locais, e que estará dispoñible a partir do 1 de xuño de 2006. Así mesmo, deberá remitirse a este centro directivo a documentación achegada polas entidades locais, conforme o disposto no punto 4 seguinte.

No suposto de as citadas certificacións non se axustaren aos ditos criterios, deberanse reenviar aos concellos correspondentes co obxecto de que sexan rectificadas os datos considerados incorrectos polas unidades de coordinación das delegacións provinciais/especiais de Economía e Facenda.

Punto 4. *Remisión á Dirección Xeral de Coordinación Financeira coas Entidades Locais da información sobre esforzo fiscal.*—Antes do 30 de setembro de 2006, remitirase a esta dirección xeral, en todo caso, a información básica (punto 1.1 desta resolución), e cando proceda, a complementaria recollida no punto 1.2 anterior.

O modelo de certificación de datos do esforzo fiscal (información básica) non deberá remitirse a esta dirección xeral sen o visado do delegado provincial/especial de Economía e Facenda nin sen se cubrir e comprobar conforme o contido desta resolución.

As unidades de coordinación coas facendas local e autonómica das delegacións provinciais e especiais de Economía e Facenda remitirán, en envío único, a esta dirección xeral a documentación achegada polas entidades locais, e ordenada conforme os códigos asignados a cada municipio polo Instituto Nacional de Estatística, unha vez comprobados e gravados os datos incluídos nas correspondentes certificacións.

No suposto de que se inclúen nos importes de recadación, de bases impositivos ou de cotas tributarias, as compensacións que por beneficios fiscais nos impostos sobre bens inmoables ou sobre actividades económicas se recoñecen, aquelas unidades deberán acompañar unha relación que conteña os nomes dos municipios afectados e os importes que correspondan a cada compensación, especificando esta e o imposto municipal a que se refira.

Se non inclúen as compensacións antes citadas nas cifras de recadación, de bases impositivos ou de cotas tributarias, deberase especificar esta circunstancia.

No caso de que a pesar da limitación establecida na alínea c) do punto 3.2 desta resolución, a recadación do imposto sobre actividades económicas supere a cota tributaria municipal, a Unidade de Coordinación correspondente deberá presentar unha relación dos municipios nos que se dá esta circunstancia, especificando o seu motivo.

Punto 5. Prórroga dos prazos. Os prazos sinalados na presente resolución poderán ser prorrogados de oficio na forma prevista no artigo 49 da Lei 30/1992, do 26 de novembro, de réxime xurídico das administracións públicas e do procedemento administrativo común, caso en que a Dirección Xeral de Coordinación Financeira coas entidades locais adoptará o oportuno acordo que será comunicado aos municipios a través dos delegados de Economía e Facenda

Madrid, 29 de marzo de 2006.—O director xeral, Alain Cuenca García.

Sres. delegados especiais e provinciais de Economía e Facenda e Sres. alcaldes-presidentes dos concellos.

ANEXO: DATOS DO ESFORZO FISCAL (1) ANO 2004

CÓDIGO INE	CONCELLO	PROVINCIA		
<p>D. Secretario/Interventor, CERTIFICA que a recadación líquida deste Concello obtida en período voluntario, correspondente ao exercicio de 2004, e referida aos conceptos impositivos que a continuación se detallan, foi a seguinte:</p>				
IMPOSTOS sobre	Xestión recadatoria do Concello (2)	Xestión recadatoria do órgano supramunicipal (3)	Compensacións recoñecidas a favor do Concello (4)	SUMA (5)
Bens Inmóveis de natureza urbana				
Bens Inmóveis de natureza rústica				
Actividades económicas				
Vehículos de tracción mecánica				
TOTAL (5)				

Así mesmo, **CERTIFICA** que, en relación co período impositivo de 2004, resultaron os seguintes elementos tributarios:

Tipo de gravame aplicado no imposto sobre bens inmóveis	Base imponible do imposto sobre bens inmóveis de natureza urbana (6)	Cota tributaria municipal total do imposto sobre actividades económicas (7)
De natureza urbana %	De natureza rústica %	Euros,

E para que conste e produza os efectos oportunos ante a Dirección Xeral de Coordinación Financeira coas Entidades Locais do Ministerio de Economía e Facenda, para a distribución da participación dos municipios nos tributos do Estado correspondente ao ano 2006, expido a presente co visto e prace do alcalde-presidente da corporación, en

Vº e prace o alcalde-presidente,

O secretario/interventor,

de 2006.

, 0 de

NOTAS ACLARATORIAS

- (1) Este certificado de esforzo fiscal, así como o que, se é o caso, expida o órgano supramunicipal de recadación, enviaranse, debidamente cubertos, á Unidade de Coordinación coas facendas territoriais da Delegación Provincial de Economía e Facenda correspondente, **antes do 30 de xuño de 2006**.
A aqueles municipios que non acheguen a documentación citada aplicaráselles na liquidación definitiva da participación nos tributos do Estado de 2006, o coeficiente mínimo de esforzo fiscal, nos termos do art. 100 a) da Lei 30/2005, do 29 de decembro, de orzamentos xerais do Estado para 2006.
- (2) Esta columna recollerá os ingresos obtidos polos tributos respecto dos que teña asumida a recadación o propio Concello.
- (3) Nesta columna reflectiranse os datos contidos no CERTIFICADO que ha de expedir o órgano recadador competente, referido ao período e conceptos sinalados.
 Esta documentación, que incluíra os importes denominados en euros, haberá de se xuntar como ANEXO ao presente modelo con **carácter obrigatorio**.
 Os ingresos directos consignaranse, na columna (2) e/ou (3) que corresponda, coa suficiente diferenciación, requirindo, se é o caso, a achega documental sinalada no parágrafo anterior.
- (4) Inclúirse no recadro correspondente ao imposto sobre bens inmobles de natureza urbana, o importe, da compensación concedida por resolución da Dirección Xeral de Coordinación Financeira coas Entidades Locais, pola bonificación da cota dese imposto, correspondente a 2004, a centros educativos concertados, segundo a Lei 22/1993, do 29 de decembro.
 Tamén se incluíra, no recadro correspondente ao imposto sobre actividades económicas, a compensación; concedida por resolución da Dirección Xeral de Coordinación Financeira coas Entidades Locales, pola bonificación do 95% da cota deste imposto, correspondente a 2004, outorgadas a cooperativas protexidas segundo a Lei 20/1990, do 19 de decembro.
- (5) Na columna de suma de importes de recadación referidos a cada imposto, así como na fila de importes totais de recadación, referidos ao tipo de ingreso segundo o órgano recadador, recolleranse as contías que resulten da operación aritmética de sumar os importes parciais incluídos nesta certificación.
- (6) Inclúirse o importe, da base imponible do imposto sobre bens inmobles de natureza urbana correspondente ao **Padrón** e ás **altas** producidas, sempre que se refiran ao período impositivo de 2004. A base imponible corresponderase co importe dos valores catastrais minorados na contía da redución establecida no texto refundido da Lei de facendas locais (D.A. novena). En calquera caso, excluirase a base imponible que corresponda a exencións do imposto.
- (7) Enténdese por cota tributaria municipal a **cota mínima, incrementada, se é o caso, por coeficientes de situación, excluindo cotas provinciais e/ou nacionais. Tampouco se incluíra a recarga provincial.**

Revisado en _____ o _____ de _____ de 2006

Vº e prace
 O xefe da Unidade de Coordinación
 coas Facendas Territoriais.

O delegado provincial ou especial
 de Economía e Facenda.

Asdo.: _____

Asdo.: _____